

ጳጳሮሲ ግፊዳ ናምዓንጎሳ ኪታ ጊዶ ቆፋ

ሃዋሬ ጳጳሮሲ ናምዓንጎሳ ኪታ ግፊዳይ ዱማ ዱማሶን ዲዛ ቤኒ አማኒዛ አሳሳ። ሄ ኢዛ ኪታስ አይፌ ዮዖይ ዎርዶ አስታማሬታ ኢታ አሶኔ ሄ ኢስታ ቲሚርቴ ጌዶን ዩዳ ባላ ዴዖ አሳይ አጋና ማላ። ሄ ዎዴ ሜዴቲዳ ሜቶታ ቢርሻናስ ዳንዳያናይ ዩሱስ ኪርስቶሳ ካሴ ባ አይፌፌ ቤዩዳይታኔ ኢዚ ታማርሲሺን ባ ሃይላን ሲዩዳ አሳቲ ኢሚዳ ቲሚርቴ ባጋራ ያሳ ጊሺኔ ጎዳ ዩሱስ ኪርስቶሳ ጊሽ ቱማ ኤራቴስ ዴሜቶ። ግፌዚ ሃራፐካ ሎዔል ናጌቲዳይ “ኪርስቶሲ ሃ ሲሚ ዩና” ጊዛ ዎርዶ ቲሚርቴ ጊሻሳ። ኢዚ ሄሳ ጊሽ ዮቲሼ “ኪርስቶሲ ኤሌሊ ሲሚ ዮንታ ማላ ኢዛ ዲጊዳይ አሲ ወሪካ ባ ናጋራፔ ሲሚዲ አታና ማላፕ አቲን አኒካ ዳያና ማላ ኮዮንታ ጊሻሳ” ጌስ።

- ሃ ማግፋይ አይኪዳ ኩሜሳ ቆፋ
- ጌሎሶ 1:1-2
- አማኒዛይታ ጌይጌቴስ 1:3-21
- ዎርዶ አስታማሬታ 2:1-22
- ኪርስቶሳስ ናምዓንጎሳ ዩሳ 3:1-18

¹ ዩሱስ ኪርስቶሳ አሳንቻኔ ኢዛን ሃዋሬ ሲሞና ጳጳሮሳፔ፣ ኑ ጎዳፔኔ ኑ ዳሌ ዩሱስ ኪርስቶሳፔ ቤቲዳ ጊሎቴሳ ባጋራ ኑ ዴሚዳ አማኖ ማላ ቦንቼቲዳ አማኖ ዴሚዳይቶ! ² ያሳኔ ኑ ጎዳ ዩሱሳ ኤሮን ኪያቴሳኔ ሳሮይ ኢንቴስ ጊዶ።

ያሳን ጌይጌቲ ኢዛን ዶሬቴስ

³ ባ ቦንቻኒኔ ባ ኪያቴሳን ኑና ጌይጊዳይሳ ኑኒ ኢዛ ኤሪዳ ጊሽ ኢዛ ያሳቴሳ ዎልቃይ ዴዖሲኔ ያሴ ጎይናናስ ኑስ ኮሺዛዝ ወርሲ ኢሚዴስ። ⁴ ባ ቦንቻኒኔ ባ ኪያቴሳን ቦንቻ ዎጋይ ዲዛይሳኔ ኬሂ ጊታ ጊዲዳ ኢዛ ሂዶታ ኑኒ ዴሚዶስ። ሄይታንታ ባጋራ ኢንቴ ኢታ አሞ ጋሶን ሃይሳ ሃ አላሜዛን ዲዛ ዳዮፔ ኬሲ ኤኪዲ ያሳቴሳ ሃኖዛፔ ኢዛራ ጊሼቲዛዴንታ ጊዲዴታ።

⁵ ሄሳ ጌዶን ሃይሳፌ ካሊዛ ሚሻቲ ኢንቴስ ጉጄታና ማላ አኔ ሚኒቴ። አማኖ ቦላ ኪያቴስ፣ ኪያቴሳ ቦላ ኤራቴስ፤ ⁶ ኤራቴሳ ቦላ ባና ሃሮ ባና ሃሮ ቦላ ዳንዳያን ሚኒቴስ፤ ዳንዳያን ሚኒቴሳ ቦላ ያሴ ጎይኖ፣ ⁷ ያሴ ጎይኖ ቦላ ኢሻንታ ዶሴቴሳ፣ ኢሻንታ

ዶሴቴሳ ቦላ ሲቆ ጉጂቴ። 8 ሃይቲ ኢንቴስ ዳሪ ዲዛዝ ጊዲኮ ሄይቲ ኢንቴና ኢንቴ ጎዳ ዮሱስ ኪርስቶሳ ኤርን ጎግይኔ አይፌይ ባይንዳይታ ጊደንታ ማላ ናጋና። 9 ሃይቲ ሃ ሚሻቲ ባይንዳ አሲ ጊዲኮ ሃሆን ዲዛ ሚሽ ዲሞንታ ቆቄ አሳ ማላ። ሄሳዴይ ካሴ አዲዳ ባ ናጋራፔ ጌይዳይሳካ ባሌቲደስ።

10 ታ ኢሻቶ! ሄሳ ጊሽ ኢንቴ ዌይጌቲዳይሳኔ ዶሬቲዳይሳ ሻኪ ኤራናስ ኬሂ አሞቲዛይታ ጊዲቴ። ኢንቴ ሄሳሶ አሲኮ ሙሌካ ዱዴቴኬታ። 11 ኢንቴ ሄሳሶ ሃኒኮ ሜርናፔ ሜርናስ ዲዛ ኑ ጎዳ ዮሱስ ኪርስቶሳ ካዎቴሳን ጌላናስ ኢንቴስ ኩሜሳ ማታይ ኢሜታና።

12 ኢንቴ ሃይታ ሃ ዮፆታ ኤሪዲኔ ሄ ኢንቴ ኤሪዳ ተማን ሚኒ ዴዲኮካ ሄይታ ታኒ ኢንቴና ቆፊሳናፔ ጉዬ ጊኬ። 13 ታኒ ጋዓ ዲዛ ዎዴ ኡባን ኢንቴና ኡባ ዎዴ ዴንሴሳናይሲ ቤሲዛዝ ሚሳቲዲ ታስ ቤቴስ። 14 ኑ ጎዳ ዮሱስ ኪርስቶሲ ታስ ቆንጨሲዳ ማላ ታኒ ሃይሳ አላሜዛፔ ኤሌላዳ ሃይቃናይሳ ታ ኤራይስ። 15 ታኒ ሃሂ ሚኔቲዛይ ታ ሃይቃዳ ኢንቴፊ ሻኬቲዳፔ ጉዬ ኢንቴ ሃይታ ሃ ዮፆታ ኡባ ዎዴ ቆጋና ማላሳ።

ኪርስቶሳ ቦንቾ ባ አይፌን ቤዱዳ ማርካታ

16 ጎዳ ዮሱስ ኪርስቶሳ ዎልቃፌ ኢዛስ ዩሳ ጊሽ ኑ ኢንቴስ ዮቲዳ ዎዴ ኑኒ ኑ አይፌራ ኢዛ ቦንቾዛ ቤዱዲ ማርካቶስ አቲን አሲ ጮ ሜላ ሜዲ ኤኪዲ ጌኔ ሃሳዩዛ ሃይሲዔ ማላ ጊዴና። 17 “ታኒ ኢዛን ኡፋዮቲዛዴይ ታ ዶሲዛ ታ ናዚ ሃይሳ” ጊዛ ቃላ ጊሪሳይ ጊታ ቦንቾራ ኢዛስ ዩዳ ዎዴ ኢዚ ያሳ አዋፔ ቦንቾኔ ጊታቴስ ኤኪዴስ። 18 ኑኒ ኢዛራ አንጄቲዳ ዙማ ቦላ ዲሼ ሃይሳ ሃ ሳሎፔ ዩዳ ጊሪሳ ኑኒ ኑ ሃይሳን ሲዩዶስ። *

19 ሄሲ ዉሪካ ካሴ ናቤቲ ዮቲዳይሲ ቱሙ ጊዲዳይሳ ሎዔስ ቆንጨሴስ። ሄሳ ጊሽ ኢንቴ ዱማሶን ዎምፔስ ሎዔስ ናጌቲዛይሳ ማላ ካሴ ናቤቲ ዮቲዳይሳ ሎዔሲ ናጌቲቴ። ኢንቴ ሄሳሶ አሳናይ ጋዴይ ዎንታናስ፣ ባዞይ ዞዓና ጋካናሲኔ ዎንቶ ማላ ያሊንቴዚ ኢንቴ ዎዝናን ፖዓና ጋካናሳ። 20 ኢንቴ ሃራፔ አሲ ቆጋናስ ቤሲዛይ ጌሻ ማፃፋን ዲዛ ቲንቢቴ ቃላን ዮቴቲዳ አይ ሚሺካ አኒካ ባስ ሚሳቲዳ ማላ ቢርሻናስ ቤሴና። 21 አይ ቲንቢቴይካ አሳ ሼኔ ማላ ሙሌካ ዩቤና። ጊዶ አቲን ቲንቢቴይ ዉሪካ ዒሎ አያናይ ካሌሲን ኢዛ ካሊዳ አሳቲ ያሳፌ ኤኪዲ ዮቲዳዛ።

* 1:18 ማቶሆሳ 17:1-5፣ ማር 9:2-7

2

ዎርዶ አስታማሬታ

1 ጊዶ አቲን ቤኒ ዎዴ ዎርዶ ናቤቲ ዴሬዛ ጊዶን ዲዛይሳ ማላ ሄሳሶካ ሃዲ ኢንቴ ጊዶን ዎርዶ አስታማሬቲ ዴዓንዴቴስ። ሄይታንቲ አሳ ዳይሲዛ ዎርዶ ቲሚርቱ ቆታራ ዲጫና ማላ አሴቴስ። ባና አሺዳ ጎዳካ ካዲዲ ባና ኤሶን ዳይሲዛዝ ባ ቦላ ኤሄቴስ። 2 ሄሳ ጊዶን ዳሮ አሳይ ዮላቺዛ ኢስታ ኦጌዛ ካሌስ። ሄ ኢስታ አሶዛ ጊዶን ቲማ ኦጌይ ጫዬቴስ። 3 ሄይቲ ዎርዶ አስታማሬቲ ሚሻስ ጋጲጋጲዛ ጊሽ ባርካ ሜዲ ኤኪዳ ዮዎ ዮቲ ዮቲዲ ኢንቴስ ዲዛዝ ባስ ቦንቂ ኤኬቴስ። ቤኒ ቤኒ ዎዴሶፕ ፐርዳይ ኢስታስ ጊጌቲ ኡቲዴስ። አዳሬ ኢስታ ዳዮይ ናጌስ።

4 ሃራይ አቶ ሺን ናጋራ አሴዳ ኪታንቻታስ ያሲ ሚሹቶንታ ኢስቲ ጪማ ጊዲዳ ዳማ አላ ጊዶን ዴዲዲ ፐርዳ ጋላስ ጋካናስ ናጌታና ማላ ጌዴ ጋናሜን ዮጊዴስ። 5 ሄሳሶካ ዊሎቴሳ ጊሽ ሳባኬ ጊዲዳ ኖሄ ሃንኮ ላፑን አሳታራ አሺዲ ያሳስ ጎይኖንታ አሳቲ ዲዛ አላሜዛ ቦላ ዳይሲዛ ሃሴ ኤሂሽ ቃዴቲዲ ካሴ ሄ ዎዴ አላሜዛ ማርቤና። * 6 ቃሴካ ያሴ ጎይኖንታይታ ቃዳዎናስ ኡባስ ሌሚሶ ጊዳና ማላ ሶዶሚይኔ ጋሞራ ካታማቲ ቢዲንስ ጊዳና ጋካናሲኔ ፀጌቲ ዳዮና ጋካናስ ኢስታ ቦላ ፐርዲዴስ። *

7 ዎጋይ ባይንዳ ዮላቺዛ አሶ አሴዛ አሳታ አሶን ኡባ ዎዴ ሶቡ ጊሹ ዲዛ ዊሎ ሎዌ ጊዲኮ አሺ ኤኪዴስ። * 8 ሄ ዊሎ አዴዚ ኢስታ ጊዶን ዲሺን ጋላስ ጋላስ ኢዚ ቤዩዛይሳኒኔ ሲዩዛይሳን ሄ ዎጋይ ባይንዳ አሳታ አሶዛን ኢዛ ሽምፖያ ዋዬታዱስ። 9 ሂስቲን ሄሲ ዉሪካ ሄሳ ማላ ጊዲኮ ጎዳይ ባስ ጎይኒሽ ዲዛ አሳታ ፓጩፕ አሻናይሳኔ ናጋራንቻታካ ዎስቲ ቃዳዎናኮኔካ ፐርዳ ጋላሳስ ዎስቲ ኢስታ ናጊዲ ጋሳናኮኔ ሄሳ ኢዚ ኤሬስ ጉሳ።

10 ሃራፕካ ሄይቲ ቱና ጊዲዳ ባ አሾ አሞ ካሊዛይታኔ ያሳ ጎዳቴስ ካዲዛይታ ፐርዳ ጋላሳስ ናጊ ዎሲዴስ። ሄይቲ ዎርዶ አስታማሬቲ ኢስቲ ዓላታኔ አቶራንቻታ ጊዲዳ ጊሽ ሳሎ ቦላ ኢስታስ ጎዳቴሴ ዲዛይታ ጫዬሽ ባቤቴና። 11 ኪታንቻቲ ኢስታሬ ቦላራ ዎልቃይኔ ጎዳቴሴ ዲዛይታ ጊዲኮካ ጎዳ ሲንላን ኢስታ ቦላ ካዴ ቃላ ኬሲ ሞቴቴና።

12 ሄይቲ ዎርዶ አስታማሬቲ ቃስ ባስ ኤሬቶንታ ኢዲዳ ሚሽ ዉርሲ ጫሺ ጫዬቴስ። ሄይታንቲ ናርዓን አይኬታናሲኔ ሃይቃናስ ዮሌቲዳ። ጮ ሜላ ባ ሽኔን ዲዛይታኔ ቆፋይ ባይንዳ ዶዓታ ማላ። ዶዓቲ ጮ ሜላ ዳዩዛይሳሶ ኢስቲካ ሙሌራ ዳዮና። 13 ቆሆ አሶ

* 2:5 ሜዴ 6:1-7:24 * 2:6 ሜዴ 19:24 * 2:7 ሜዴ 19:1-16

አሲዳ ጊሽ ኢስቲ ሙሌራ ባ አሶ ዋጋ ኤካና። ኢስታ ኡፋይሲ ሴታ ጋሳስ ማሶቴሲኔ ዎጋይ ባይንዳ ቡራቆ። ኢስቲ ሄሳ ማላ ዎጋይ ባይንዳ ጉፋን ኢንቴናራ ኢሲፌ ያይጌቲዛ ዎዴ አስ ባሌሲዛ ባ አሾ አሶዛን ኢስቲ ኢታኔ ዩላቺዛይታ። 14 ኢስታስ ናጋራ አሶፕ ናጌቶንታ አሞቲዛ አይፌይ ዴስ። ኢስታስ ናጋራ አሶ ሲቂዛ አሞቴሲ አይ ዎዴካ ሲሜና። አማኖን ቡሮ ሚኒ ኤቆንታ አሳታ ባሌሴቴስ። ሚሻስ ጋጲጋጲቴስ። ኢስቲ ቃንጌቲዳይታ። 15 ኢስቲ ሱሬ አጌዛ አጋጊዲ ዳዩዳ። ኢታ አሶ አሲዲ ዴሚዛ ሚሽ ሲቂዳ ቢዎሬ ና ባላዓሜ አጌ ቢዲ ባሌቲዳ። 16 ባላዓሜይ ጊዲቲ ባ አሲዳ ናጋራ ጊሽ ሴሬቲዴስ ሺን ሃሳዖ ኤሮንታ ሃሬያ አሳ ቃላን ኢዛስ ሃሳዖዳ ሄ ናቤዛ ባላፕ ሴራ ዛራዱስ። 17 ሄይቲ ሄ አሳቲ ሃሲ ባይንዳ ፑልቶታ። ጎቲ ሜርኮን ቢዛ ሻራ ማላ፤ ኢስታ ሳካና ዳማይ ናጌስ። 18 ካሴ ባላ ጋርሳን ዲዛ አሳታ ጊዶሬ ኬሲ ኤኪ ዩዲ ዳሮ ጋምዖንታ አሳታ፤ ጮ ሜላ ሃዳ ጊዲዳ አቶሮ ቃላ ሃሳዖን፤ አሾ አሞኒኔ ላይማን ባሌሴቴስ። 19 “ኢንቴ ዎዜታና” ጊሼ ኢንቴስ ኡፋይሲ ኢሜቴስ። ዖኔቲዳ አሲ ባና ዖኒዳዴስ አይሌ ጊዲ ሃሬቲዛይሳሶ ኢስቲካ ባስ ናጋራስ አይሌ። 20 ኑ ጎዳኔ ኑና አሺዳ ዩሱስ ኪርስቶሳ ኤሪዲ ሃ አሳሜዛ ቱናቴሳፌ ኬሲ ኤኪዳፕ ጉዩ ቃሴካ ጉዩ ሲሚዲ ሄ ካሴ ቱናቴሳን ዖኔቲዳ ጌሊኮ ኢስታስ ካሴይሳፌ ጉዩይሲ አዶ ኢታ ጊዳና። 21 ኢስቲ ጊሎቴሳ አጌ ሻኪ ኤሪዳፕ ጉዩ ኢስታስ ኢሜቲዳ ጌሻ አዛዞዛፕ ጉዩ ሲማናፕ ኢስቲ ካሴ ሄ ጊሎቴሳ አጌዛ ኤሮንታ አጊዳኮ ኢስታስ ሎዖሺን። 22 “ካናይ ባ ጮዩዳ ጮሻ ማናስ ጉዩ ሲሜስ” ሄሳሶካ “ጉዱንሲ ሜጩቲዲ ጉዩ ሲሚ ኡርቃን ጌንዴሬቴስ” ጌቲቲዛ ቱሙ ሌሚሶይ ኢስታ ቦላ ጋኪዴስ። *

3

ጎዳ ዩሱስ ኪርስቶስ ናምዓንሶ ዩስ

1 ታ ሲቆቶ! ታኒ ኢንቴስ ዓሬሺን ሃይሲ ናምዓንሶ ኪታ። ታኒ ኢንቴስ ናምዑ ኪታታካ ዓሬዳይ ሃይታ ሃ ዮዖታ አኪኪ ኤኪዲ ኢንቴ ሱሬ ቆፋ ቆፓና ማላ ኢንቴና ቤጎሳና ጋዳ። 2 ሃይሳፌ ካሴ ጌሻ ናቤቲ ዮቲዳ ቃላኔ ቃስ ኢንቴ ሃዎሬታ ባጋራ ኢንቴ ዴሚዳ ኑ ጎዳኔ ኑና አሺዳይሳ አዛዞ ኢንቴ ዩሺ ቆፓና ማላ ታ ኮያይስ።

3 ሃራ ኡባፌ ካሴቲዲ ሃይሳ ዩሺ ቆፒቱ። ዉርሴሳ ጋላሳታን ቂዲዛይቲኔ ባ ኢታ አሞ ካሊሼ አሳ ካዲዛይቲ ያና። * 4 ኢስቲ ቃስ “ጎዳ ዩሱስ ‘ያና’ ጊዛ ሂዶታይ ዮቴቲቤኔ? ሂስቲን ኢዚ

* 2:22 ሌም 26:11 * 3:3 ዩሁ 18

አዋን ዲዜ? ቤኒ ኑ አዋቲ ሃይቆሳፔ ሃ ሲሚን፥ ሃኒዛ ሚሺ ወሪካ ሜዴቶሳፔ ሃ ሲሚን ሄኮ ካሴ ባ ዲዛ ማላ ዴስ” ጌቱስ። * 5 ሄይቲ ሄ አሳቲ ካሴ ዳሮ ዎዴፔ ካሴ ሳሎይ ያሳ ቃላን ሜዴቶይሳኔ ቢታይካ ሃሳፊኔ ሃላን ዲዛይሳ ኤሪሼ ካዴቱስ። * 6 ሄ ዎዴ ዲዛ አላሜዚ ሃላን ሚቱቲ ዳዩዴስ። * 7 ሄሳሶካ ሃሂ ዲዛ ሳሎይኔ ቢታይ ናጋራንቻቲ ዳያና ዲዛ ፐርዳ ጋላስ ጋካናስ ታማስ ጊጊ ኡቲዳ።

8 ታ ሲቆቶ! ኢንቴ ጊዲኮ ጎዳ አቻን ኢሲ ጋላሲ ሺ ላይሳ ማላ፥ ቃሴካ ሺ ላይሲ ኢሲ ጋላሳ ማላ ጊዲዳይሳ ሄሳ ሄ ሃኖዛ ባሎፐቱ። * 9 ኢሲ ኢሲ አሳታስ ሚሳቲዛ ማላ ጎዳይ ባ ዮቲዳ ሂዶታ ቃላ ፖላናስ ጋምዴናኮ ሺን አሲ ወሪካ ማሬታና ማላኔ አይ አሲካ ዳዮንታ ማላ ኮይዲ ኢዚ ኢንቴ ጊሽ ታኩስ።

10 ጎዳ ጋላሳይ ቃሴ ካይሶ ዩሳ ማላ ቆፖንታ ዲሺን ጋኪ ዎዳና። ሄ ጋላስ ሳሎቲ ጊታ ጊሪሳን አዳና። ሜዴቲሲ ወሪካ ታማን ፀጌቲ ዳያና፤ ቢታይኔ ኢዛ ቦላ ዲዛዚ ወሪካ ፀጌታና። *

11 ሄሳ ጊሽ ሄይቲ ወሪካ ሄሳሶ ዳያናዚ ጊዲኮ ሂስቲን ኢንቴ ጌሻቱላን ያሳስ ጎይኒሼ ዳናስ ኢንቴስ ዋኒ ቤሴኔ? 12 ሄሳ ጊሽ ያሳ ጋላሳይ ያናይሳ ኢንቴ ላሞቲዛይታኔ ኢዚ ኤሌሊ ያና ማላ አሲዛይታ ጊዲቱ። ሄ ጋላስ ሳሎይ ታማን ፀጌቲ ዳያና። ሜዴቲሳቲካ ታማ ሴላን ሴራና። 13 ጊዶ አቲን ኑኒ ኢዚ ኑስ ኢሚዳ ሂዶታ ማላ ዲሎቴሳ አሶይ አሴቲዛሶ አራሳ ሳሎኔ አራሳ ቢታ ናጎስ። * 14 ሄሳ ጊሽ ታ ሲቆቶ! ሄሲ ወሪካ ሃኖና ጋላስ ኢንቴ ናጊሼ ዲኮ ጎዳይ ኢንቴና ኢንቴ ቦላ ቦርይ ባይንዳ ዲሺን ሳሮቴላን ዴማና ማላ ሚኒ ዲቱ። 15 ኑ ጎዳ ዳንዳያይ ኢንቴና አሻናስ ጊዲዳይሳ ኢንቴ ኤሪቱ። ኑ ሲቆ ኢሻ ጳወሎሲ ባስ ኢሜቲዳ ኤራቴሳ ማላ ኢዚ ኢንቴስ ዓፊዳይሲ ሃይሳ። 16 ኢዚ ሃይሳ ሃ ሃኖዛ ጊሽ ባ ኪታታን ኡባን ሃይሳሶካ ዓፊዴስ። ኢዛ ኪታታ ጊዶን ኤራናስ ዎይሲዛ ኢሲ ኢሲ ሃኖቲ ዴቱስ። ኤራቴሲ ኢስታስ ፓፊዳይቲኔ ናምፀ ቆፋን ዮቁ ጊዛይቲ ሃራ ጌሻ ማፃፋታ ሚርቁዛይሳሶካ ሃይታካ ኢስቲ ሚርቃና። ኢስቲ ሄሳሶ አሲዛይ ባስ ዳያናሳ።

17 ታ ኢሻቶ! ኢንቴ ቃስ ሄሳ ካሴቲዲ ኤሪዳ ጊሽ ሃንኮ ማካላታ ባላ ጌዶን ጎሼቲ ቢዲ ካሴ ኢንቴ ሚኒ ዲዛሶፔ ኩንዶንታ ማላ ናጌቲቱ። 18 ሄሳፊ ቦላራ ኑ ጎዳኔ ኑ ዳሴ ዩሱስ ኪርስቶሳ ኪያቴላኒኔ ኢዛ ሻኪ ኤሮን ፑዴ ዲፊቱ። ኢዛስ ሃሂካ ሜርናስካ ቦንቾይ ጊዶ። አሚን።

* 3:5 ሜዴ 1:6-9 * 3:6 ሜዴ 7:11 * 3:8 ማዛ 90:4 * 3:10 ማቶ 24:43፤ ሉቃ 12:39፤ 1ታሶ 5:2፤ አጁ 16:15 * 3:13 ኢላ 65:17፤ 66:22፤ አጁ 21:1

አራሳ ጫቆ ማገፋ ጋሞላ

New Testament in Gamo (ET:gmv:Gamo)

copyright © 2011 Wycliffe Bible Translators, Inc.

Language: Gamo

Translation by: Wycliffe Bible Translators, Inc.

Copyright Information

© 2011, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Gamo

© 2011, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 22 Sep 2022 from source files
dated 29 Jan 2022
dffa0cbb-5f77-5875-bf95-f4176677af45